

四庫全書

集部

欽定四庫全書

集部

栢齋集卷二

詳校官中書

臣孫溶

中書

臣劉源溥覆勘

總校官中書

臣朱鈐

校對官學正

臣陳木

謄錄舉人

臣羅允文

欽定四庫全書

集部六

栢齋集

別集類五

明

提要

臣

等謹案栢齋集十一卷明何塘撰塘字粹

夫號栢齋武陟人弘治壬戌進士官至南京

右都御史謚文定塘篤行勵志其論學一以

格致為宗集中送湛若水序謂甘泉以存心

為主予以格物致知為先非存心固無以為

格致之本物格知至則心之體用益備其生平得力在此故當時東南學者多宗王守仁良知之說而瑯獨以躬行為主不以道學自名復留心世務如均徭均糧論兵諸篇皆能深中時弊雖其文體朴質不斤斤於格律法度之間而剴切詳明不支不蔓猶存弘正以前規範與卮言勸說者流相去遠矣集凡文十卷詩一卷為嘉靖己酉鄭王所刻又有所

著陰陽樂律儒學管見則趙王摹印以傳目
為栢齋三書今別行於世云乾隆四十二年

十月恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--	--

欽定四庫全書

柏齋集卷一

明 何瑋 撰

講章

尚書講章

禹曰都帝慎乃在位帝曰兪禹曰安汝止惟幾惟康其
弼直惟動不應後志以昭受上帝天其申命用休

這是虞書益稷篇史臣記大禹告舜的言語都是歎

美辭帝是指帝舜俞是然其言止是事物之理具於
吾心各有至善所當依據而不可移易的意思幾是
事之發動處康是事之安穩處弼是指輔弼之臣僕
是待申是重休是美大禹將要告舜先歎美曰都又
特稱帝以起其聽說道帝居天子之位若一念不謹
慎則四海之內皆不得安一日不謹慎則千百年之
患便從此起所以須要謹慎不可放肆帝舜聽了遂
說爾的言語誠然有理我當從爾所言凡事謹慎禹

要帝舜知道謹慎的勾當故又說道人心之靈事事
物物莫不有箇至公至正的道理只因私欲的念慮
動搖其中所以此心常危殆不安為人君的凡處一
事接一物必要心心念念專在道理上這便能安其
所止而不陷於人欲之危若是幾發動的去處須要
仔細計較不要差了念頭及事務成就的時節須安
穩停當不可苟且施行這便是惟幾惟康倘所行一
有差錯陷於私欲輔弼的大臣又肯直言勸諫不使

人君陷於有過之地這便是其弼直君臣上下交相
儆畏謹慎之道不過如此天下的人心都有這箇道
理人君所行的既合道理了但凡有所動作則人心
無不響應固有在我發意之先預先等待的況上天
福善禍淫都看著人心向背以此昭受上帝之命天
豈不重重眷命加以以休美之福乎這便是謹慎的
效驗臣竊惟大禹之言切於治道帝舜一聞而即從
之見諸施行所以天下太平萬世稱為聖明之主仰

惟皇上所居之位即帝舜之位伏願端存心出治之本聽輔弼忠直之言上下交通天人協應太平之治可齊於二帝宗社之休必保於萬年矣臣愚不勝惓惓伏惟聖明留意

奏議

史職議

修史職以備國典事伏以有官守者則思修其職有言責者則思盡其忠此人臣之大防而古今之通誼也臣

以菲薄待罪史官伏覲內外百司各有職守而史官獨
若無所事者朝叅之餘退安私室於國家政務無分毫
補益猶且月受俸錢日支廩給既失官守之職難逃尸
素之譏每念及茲不勝惶愧臣謹考古者王朝列國皆
有史官掌記時事我祖宗設修撰編修檢討謂之史官
俾司紀錄法古意也謹按國朝名臣錄在太祖時劉基
條答天象之問上悉以付史館在太宗時王直以右春
坊右庶子兼記註凡聖政聖訓之當書者皆錄之以

備纂述由此推之史官之職在國初猶未失也不知因循廢墜始於何時沿襲至今未克修舉臣於受職之初即欲陳奏自以無所考據又慮人微言輕未必聽用徒為嘵嘵實亦何補含愧苟祿奄過歲時既又念聖賢相逢百廢皆舉擇言而從不以人廢於此時而不言是終無可言之日矣方擬陳奏不幸孝宗皇帝奄棄萬國哀慕方切豈暇圖此方今山陵既畢政治維新伏望遵祖宗所已行修史職於久廢勅令修撰編

修檢討直史館凡陛下之起居臣工之論列大政事之
因革弛張大臣僚之陞降拜罷皆令即時紀錄止用據
事直書不須立論褒貶仍於紙尾書某官某人記藏之
匱櫃以待纂述史職既修國典斯備上則聖君賢臣嘉
謨嘉猷不至有所遺落下則儉夫小人懼遺萬世之譏
亦有所懲戒不敢縱恣為惡公則明朝廷無虛設之官
私則使人臣免素餐之愧事體甚便或謂館閣之地所
以儲養異才不必擇以職守臣竊謂養才之道當使之

周知天下之務方可以備他日之用今諸人於國家政
事初不聞知雖欲練習其道無由若令史館供職庶因
紀錄之間得練習政事之體他日任用不至疎脫是於
修職之中實寓養才之意臣愚不勝惓惓

戰船議

議處戰巡船隻事該都水司呈奉本部送准操江衙門
咨云到司查得本部嘉靖六年造完戰巡船八十四
隻今年見造又一百四隻其工食例該本部措給其物

料會無者例皆坐派蘇松等府徵解查得六年修完船隻物料先已招商應用今尚有四府未完今年物料各府通無解到照得咨內開稱已及年分損壞船又一百二十八隻例該修造未及年分損壞船六十三隻不久捱及年分又該修造其物料俱該坐派蘇松等府恐民力不堪呈乞議處到部照得南京內官監供應器皿及裝盛物料神宮監司苑局等衙門薑棚及薑芽竹簍等材料本部供應器皿及修船物料例俱坐派蘇松等府約

計銀十萬兩以上見今累催俱未完解固由官吏違慢
亦由民貧辦納不前其操江損壞戰巡船一百八十一
隻若再坐派深恐民力不堪有如該司所慮擬合議處
查得永樂年間額設戰船止一百三十一隻宣德以後
漸增至三百一十九隻至成化年間止存一百四十隻
具載會典當時不聞悞事今乃增至四百隻比永樂年
間三倍有餘宜量減其半庶得少寬修造不至連年坐
派以重困疲民或謂其有備無患操江船隻不可輕減

臣等議得兵家之法雖稱有備無患尤當料敵度時若
強敵大盜出沒於江湖之間必用水戰決勝則戰船不
得不多若強敵大盜或在北欲渡江而南或在南欲渡
江而北則戰船止於巡邏把截自不須多蓋敵一登岸
戰船即皆無用故也況今四方寧靜無強敵大盜之警
其出沒江上者不過鹽徒小盜若設戰巡船二百隻如
以府縣巡司等船固已足用其多餘戰巡等船實係無
用縱有大盜卒起兵部馬快等船不下四五百隻亦可

一時借用不為無備今乃以多餘無用之船而連年坐派以重困疲弊之民似為非計又查得新江口戰座巡哨等船舊例五年一修十年一造先年損壞俱係操江官軍自備物料修理天順三年該南京內守備題會同外守備并本部議將座船二隻先儘舊料不敷之數會有關支會無買辦動支官錢給還戰船該用物料以五分為率二分官為出備三分原船官軍出備會議題准一向遵行至成化二十年該外守備奏要將損壞船隻

止行南京工部修造本部備查題准事例具奏仍准照舊官二軍三至成化二十三年又該內外守備題巡軍比操軍辛苦巡船損壞要行南京工部修造工部覆題備行本部查照果無別議將該用物料查會關支買辦仍委官一員嚴督龍江提舉司官吏匠作及南京中軍都督府差撥官軍與同原船旗軍相兼用工修造本部既失於查照題准見行事例執奏又失於查照原奏情節乃將巡船並戰船通與修造從此遂成故事弘治十

八年又該本部奏准將改造戰巡等船會無物料坐派直隸蘇松等府州縣辦解沿襲至今遂為定例各船旗軍因戰船損壞俱本部修造利害不切於彼遂將戰船視為官物非止不加愛惜甚或暗行作踐往往不及年分先已損壞捱及年分則又移文本部修造其弊已久臣等議得運糧官軍勞苦萬狀運船損壞尚與官停半出銀修造操江官軍安逸已甚戰船損壞反不出分文止行本部修造已為不平又致生戰船速壞之弊深為

未便乞勅該部會同兵部計議如臣等所議萬一可采
乞將戰巡船量留二百隻應用其餘俱送龍江提舉司
拆卸堆垛候留用船隻損壞即用修造不敷料銀或查
照題准舊例以五分為率官二軍三或比照運船事例
官軍停出戰船既減則修造自少操軍知愛惜其船則
損壞必遲修造益少修造益少則物料本部可辦不必
坐派各府以重困疲民事體似甚便益

織造議

議處織造絲料及叅劾不職官員事該都水司呈奉本

部送准守備揭帖

云

案呈到部卷查嘉靖四年

云

云

據鋪戶何輔等告

云

又行據南京丙字庫中

云

照

得諸司職掌內開凡織造供用袍服段疋及祭祀制帛

須於內府置局織造其所用蠶絲紅花藍澱於所產去

處稅糧內折收按歲差人送庫支用是知織造制帛絲

料會有在丙字庫支用係祖宗正法嘉靖四年料造制

帛一萬五千段本部失於查照將該用絲料不作會有

行丙字庫支用却作會無行應天府鋪戶買用實係違
法叅照鋪戶何輔所告情既可憫理亦甚直既丙字庫
中有堪用細絲擬合將原擬行應天府鋪戶買絲一節
改正會有行丙字庫支用已經行移神帛堂遵依選用
及條送南京禮部擬行會題去後今准南京守備司禮
監太監高某等揭帖內稱神帛堂堂長稟稱丙字庫絲
不堪織造等因臣等叅看得丙字庫內外官員吏典人
等職專收支乃將稅糧折收串五細絲濫收粗絲以致

不堪織造支用若非受賂徇私亦係怠職悞事查得大明律起解金銀足色條下凡收受諸色課程變賣物貨起解金銀須要足色如成色不及分數提調官吏人匠各笞四十著落均陪還官所據該庫內外官員吏典人等相應比附前律查提究問但該庫申稱所收絲堪用又經守備官選中今神帛堂却稱其絲不堪叅以鋪戶告詞中間恐有別情乞勅該部計議合無將該庫內外官員人等比附前律提問惟復別有定奪通行奏請上

裁候有成命遵照施行再照揭帖又稱神帛堂急缺織造絲料要行從長議處叅詳主意不過要照舊行應天府鋪戶買用臣等議得買絲違法損民且使折收絲終歸無用公私兩病深為未便本部既知其弊豈可復行但本堂執稱該庫所收串五絲俱不堪用若不急為議處往來駁難不免悞事乞勅該部移文戶部轉行南京戶部計議合無將明年以後湖州府解到串五絲徑送本堂收用仍行移兩字庫知數公私兩便庶經久可行

又查得諸司職掌內開蠶絲出產在浙江湖州府每年該折收六萬觔見今每年折收串絲荒絲各止二萬兩計各止一千二百五十觔其神帛堂每年該用絲數累次行查堅不准行以此不知的數據守備平日口稱每年織三千段該用絲二千八百十二觔八兩又查得內織染局所織誥勅絲料亦該在丙字庫支用每年織一千道計該用絲若干觔照得見今折收串五絲數少支用不敷不免又費議處亦乞轉行南京戶部計議再查

神帛堂如果每年織制帛三千段則串五細絲再加派二千七百五十觔務勾兩衙門支用此係舊制不為多事再照丙字庫見有絲近年者已該三萬五千餘觔遠年者不知其數既各衙門俱不支用俱將化為灰燼似亦可惜亦乞轉行南京戶部議處為便緣係議處織造絲料及叅劾不職官員事理

云云

制帛一段長十八尺 料串五絲十五兩每尺該絲八錢三分三釐強

誥命一品文職長一丈二尺 料串五絲一觔十二兩

六錢一分二釐五毫 二品長一丈 料絲一觔六

兩八錢六分二釐五毫 三品長八尺五寸 料絲

一觔四兩一錢八分七釐五毫 五品長六尺 料

絲一觔五錢一分二釐

勅命 料絲十三兩六錢九分二釐五毫

誥武職 料絲十三兩一錢三分八毫

此料數係織造原數今以制帛分兩丈尺計之似乎至

多當時亦欲題准減省後以遷官未奏云

民財空虛之弊議

理財足民以安天下以保聖治事臣竊聞平天下之道重在理財蓋財用之盈虛係民生之休戚而國家之安危治亂從之是固不可忽也古人有言天下之財不在官則在民去年因陝西四川河南湖廣山東山西等處凶荒各該撫按官員累奏王府祿米軍士月糧多有欠缺無從處補軍民人等餓死數多無從賑濟則是在官

在民之財皆空虛不足可想見矣臣竊以為在官之財不足固為可慮然不若在民之財不足可慮之甚也蓋民財不足則樂歲不免於凍餒而凶年必至於死亡凍餒死亡之憂迫之於中而剝削差科之患又迫之於外事勢窮極盜賊必起此蓋宗社之憂非小小利害也是豈不甚可慮哉去歲凶荒賴皇上聖明亟行蠲免大為賑濟民心少安然而死者已衆萬一不幸頻歲凶荒不知民何以堪命是蓋不可不預為之所也臣猥以迂疎

備員戶部叨有理財之責竊計在官之財所以空虛不足者其弊有四在民之財所以空虛不足者其弊亦有四宗室日蕃武職日濫冗食太多冗費太廣此四弊者在官之財所以空虛而不足也而徵納逋欠之弊則又在其外焉官吏剝削差科繁重風俗奢僭生齒蕃多此四弊者在民之財所以空虛而不足也在官之財不足四弊本部先已具題外其在民之財不足四弊臣謹開坐具奏伏望皇上憫百姓之困窮念宗社之大計勅令

該部議擬採行則民財可足天下可安而皇上孜孜求治之念亦可以少副矣臣愚不勝惓惓

一官吏剝削

傳稱國家之敗由官邪也官之失德寵賂彰也蓋官吏貪賂必剝削小民小民窮困不堪小則為盜大則作亂而國家之治敗矣此必然之理也我太祖高皇帝起自民間深知其弊故立國之初痛懲貪賂官吏甚者即行誅殺以快小民之心既製為大誥醒貪錄諸書以戒諭

之又定為官吏受枉法贓滿貫罪絞之律以恐懼之是以當時官吏畏法小民得安晚年因見法令已行貪風已革乃於洪武三十年定官吏受贓滿貫者為雜犯死罪准其收贖蓋不忍以財物之故傷人性命此聖祖寬恤之仁也奈何官吏不才不體聖祖之心漸故貪賂之習積至正德年間其弊極矣官以賂陞罪以賂免輦轂之下賄賂公行郡縣之間誅求無忌小民受害殆不忍言百姓困窮盜賊蠭起國家之事幾至大敗臣不勝憂

忿於正德六年奏言先欲勅諭大臣令其守廉奉法以
倡百官次欲將貪贓害民官員凡犯取受入已贓滿貫
以上俱籍沒資產輕則為民重則充軍軍職犯贓一體
歸斷所冀法令嚴明則貪官知懼民困可蘇國家可保
耳當時論者皆謂臣言苛刻難以施行臣竊謂責人以
難能之事則材知有限不可勉強若一槩加罪則誠為
苛刻至於貪與不貪則在乎肯與不肯非有甚高難能
之事况彼奪民財而法乃籍沒其財情法似乎相對且

未嘗傷其性命似未為苛刻論者之意不過謂士君子
辛苦仕途有所取受亦是常情罪以籍沒似可矜憫耳
臣竊聞有宋之時范文正公當道遇不才監司一筆勾
之富鄭公曰公但知一筆勾不知一家哭矣范公曰一
家哭何如一路哭耶富公亦當時賢者其言亦近於厚
但其所見之公私大小則不逮范公遠矣况官吏貪賂
則剝削小民小民困窮則遺禍國家情既可惡關係尤
重此與其他不才悞事者不同是安可過為姑息而不

加重治哉伏自皇上即位以來選用忠賢禁止賄賂輦
轂之下號稱清明然府縣之間貪風猶在誅求剝削至
今未已上司多事姑息不行嚴治甚者交通賄賂縱容
行私民財日空民生日困其弊大端在此此風不革而
欲望小民之安國家之治蓋斷乎無是理也臣愚竊聞
治久病者用毒藥革久弊者用重典宜先申明戒諭天
下百官令其守廉愛民令下之後敢有仍前貪賂害民
者凡犯枉法贓滿貫以上俱籍沒貲產照例充軍犯不

枉法及侵盜贓至銀一百兩以上及他物值銀一百兩以上者亦籍沒貲產照常為民軍職犯贓一體歸斷若上司官承告官吏貪贓事情不與受理及雖與受理而擬斷不如法者即以不才黜退有贓者亦從重論每年終巡按御史及法司俱將問過贓官起數造冊具奏以憑查考其奸頑妄捏贓私排陷官吏者除問以誣告罪名仍遷徙化外夫貪官之所愛者財耳若止去其官不奪其財彼猶不失其富既不知耻豈肯改行若籍沒法

行則雖不問以死罪彼慮并失其原有之財必知警懼則貪風庶乎可革民財不耗民困可蘇而國家之治庶可保之於無窮矣

一差科繁重

傳稱時使薄歛以勸百姓為天下國家經常之道蓋為治不能不使民但使之以時而不竭其力斯可矣不能不取民但歛之以薄而不匱其財斯可矣此蓋古聖賢之明訓而萬世不可易也仰惟國朝使民之法除里甲

正辦外如糧長解戶馬頭船頭館夫水夫馬夫祇候弓
兵皂隸門禁厨斗之類無所不役固已多矣但國初法
令嚴明編僉有數故民力未至甚勞近年以來則常役
之外雜派夫役紛紛而出如斫柴夫擡柴夫修河夫修
倉夫運料夫接遞夫站夫鋪夫閘夫淺夫之類因事編
僉蓋有不可勝數者矣國朝取民之法除田土稅糧外
如鹽課茶課金銀課鐵課魚課稅商船鈔戶口食鹽皮
角翎毛油漆竹木之類無所不取固已重矣但國初於

公用物料猶令稅糧折納或官錢收買故民財未至甚
費近年以來則額徵之外雜派物料又紛紛而出如供
用庫物料甲丁庫顏料光祿寺厨料太常寺牲口南京
則又有供用器皿物料戰巡船隻物料內府各衙門應
用物料隨時坐派蓋有不可勝數者矣以上夫役物料
臣之所知者耳所不知者尚不止此例皆取辦於民上
司惟務事行至於民力之堪與不堪民財之敷與不敷
皆不暇計賢能守令縱有愛民之心迫於上令亦不能

自行其志不才官員則又因以為利加以吏典與里胥
賣放多科小民受害所不忍言民財之耗民生之困此
亦大端也臣竊以為前項雜派夫役既不可免惟編之
有數用之有時庶可少寬民力使受一分之賜宜行令
各州縣通將人丁查出畧倣古昔用民之力歲不過三
日之意其人丁除役占優免外每人五丁編夫一名歲
役不過一月每丁各該六日不行者貼工食銀一錢二
分南方以田起夫者則每田百畝作人一丁計數編夫

俱准前例或本處工多夫少如其工可緩者令挨年次第舉行如緊急不可緩者令將鄰近州縣夫通融協濟大率遠者出銀近者出力或民自願赴工不願出銀者聽從其便如本處及鄰近通無工者則寬以與民至於雜派物料則宜仍照國初舊例係遠方州縣產有者或令稅糧折納或以該徵稅課錢鈔收買差人解送應用係京師近地產有者則徑以各處解到稅課錢鈔收買不必坐派通不許令民出辦其各項物料內有不係緊

用者仍令各該衙門查出量為裁減如此則民財少省
民困可蘇而國家之治可保之於無窮矣

一風俗奢僭

易稱節以制度不傷財不害民又稱履以辨上下定民
志蓋用度奢侈則民財必傷上下不辨則民志不定此
蓋必然之理而為治者所當念也仰惟我太祖高皇帝
於開國之初凡官民房屋衣服器皿之類即定有制度
上得兼下下不得僭上違者各治以罪其居處僭上用

者至處死籍沒立法之意蓋甚嚴矣彼時百姓初脫亂
離之苦凡百用度取給而止奢僭甚少中間奢僭犯禮
者不過二三豪家聖祖已嚴為禁約如此自國初至今
百六十年承平既久風俗日侈起自貴近之臣延及富
豪之民一切皆以奢侈相尚一宮室臺榭之費至用銀
數百兩一衣服燕享之費至用銀數十兩車馬器用務
極華靡財有餘者以此相誇財不足者亦相倣效上下
之分蕩然不知風俗既成民心迷惑至使閭巷貧民習

見奢僭婚姻喪葬之儀燕會賻贈之禮畏懼親友譏笑亦竭力營辦甚稱貸為之官府習於見聞通無禁約間有一二賢明之官欲行禁約議者多謂奢僭之人自費其財無害於治反譏禁者不達人情一齊衆楚法豈能行殊不知風俗奢僭不止耗民之財且可亂民之志蓋風俗既以奢僭相誇則官吏俸祿之所入小民農商之所獲各亦不多豈能足用故官吏則務為貪饕小民則務為欺奪由是推之則奢僭一事實生衆弊蓋耗民財

之根本也臣愚以為風俗既壞非嚴為禁治則弊不可
革宜令禮部查照祖宗舊制再行申明如婚姻喪葬禮
物粧奩祭祀燕飲之類舊制未備者亦各定為制度其
僧道死喪追薦災禍祈禳之類或通行禁止或令比照
祭祀制度而行制度既定通行天下刻榜禁約犯者除
問罪外俱將其違法之物沒官如飲食諸物不可沒官
者則照依所費罰之以十分為率俱以三分給告人充
賞七分備賑及補助貧民糧差拖欠之用再犯倍罰三

犯不分官民俱遷徙化外如該管官員承告官民奢僭事情不與受理及雖與受理不照例罰治者俱依制書有違問罪通不管理者即以不職罷黜蓋出令在君承君之令而致之民在臣臣既不奉行君令不職甚矣罷黜何疑或謂告人給賞則起告訐之風犯人罰沒或為貪官之地皆非治體難以施行臣竊以為令貴必行禁貴必止令之不行禁之不止雖堯舜不能為治緣官民奢僭該管官員必須見知方可罰治若告人無賞則人

皆謂奢僭者自費其財於我無損出名告舉徒結讎怨
於我何益下人既不告舉上官何由見知欲令行而禁
止難矣聖祖於除奸革弊皆賞告人蓋為此也至於將
違法之物沒官及物之不可沒官者照所費罰銀備賑
或補貧民糧差拖欠則損有餘而補不足者無所不可
若官吏侵欺自有正法柰何預為計慮遂將禁治奢僭
之良法格而不行哉臣又聞京師四方之極君身萬化
之源故化行自上法行自近伏望皇上敦行節儉為天

下先嚴戒內外官員節用惜福不許過為奢僭以壞風俗違者聽科道糾舉一體罰治如此則民財不耗民志不惑而國家以禮教民之治庶可成矣

一生齒蕃多

孔子適衛嘗有民庶之嘆冉有問既庶矣又何加焉孔子曰富之蓋庶而不富則民生不遂治功不成此必然之理也仰惟國朝開創之初亂離初定人民鮮少土地所生之物供養自然有餘承平既久生齒蕃多而土地

所生之物無所增益則供養自然不足以官吏剝削
差科繁重風俗奢侈則民財安得不耗民生安得不困
方今民困極矣向上三弊若蒙准行則可救其半至生
齒蕃多別無善策惟有盡辟地利以資生養一法尚可
施行方今地窄之處貧民至無地可耕而鳳陽淮徐山
東登萊等處荒田彌望近日臣下建言欲命官勸農開
墾荒地其意亦皆在此但開墾荒地之法其事甚難蓋
召集開地之人類多貧難不能自給久荒之處人稀地

僻新集之民既無室廬可居又無親戚可依又無農具種子可用務農時月不暇他營朝暮飲食何所取給故往往不能安居樂業輒復轉徙雖設有勸農之官亦終無成效臣愚以為設官勸農非假以事權則無以使之行其志非齊以賞罰則不能使之盡其心今山東雖命官勸農而未假以事權鳳陽等處則皆未命官宜勅該部選擇通知農務之士授以按察之官賜以勅書令其專管勸農或查撥本處丁多田少之人或招集外處流

徙失業之人或起取狹鄉無地之人俱聽從便宜施行
凡農民該用室廬農器種子賑給俱許其動支官錢處
置仍令其無管詞訟凡所收紙價贖銀俱聽其便宜支
用至分行催督許令設立老人管理老人盡心勤謹者
許從便賞勞仍刊給農桑撮要等書使各知種植之法
三年之後地已成熟每畝科米五升即以補該縣逃移
逋欠糧額官量陞轉仍留勸農六年之後農功大成超
與陞授或因循怠惰三年無成亦量行責降仍通行州

縣官凡有荒地去處各令教民開辟三年之間地辟而糧完者考以稱職地荒而糧欠者考以不職如此則官肯盡心民肯盡力地利盡辟非惟生齒之蕃得有所養而公家之用亦有所資矣

奏疏

東昌同知乞致仕狀

患病不能供職乞恩放歸田里事臣見年四十二歲係河南懷慶衛軍籍直隸揚州府泰州如皋縣人由進士

歷任翰林修撰正德五年三月內奏准致仕正德六年
二月內行取復職正德八年四月內因不謹得罪改調
直隸大名府開州同知正德十年閏四月內轉陞今職
當年五月初十日到任伏念臣才既迂疎身復多病本
不宜久在仕途先年已得放歸田里後來復蒙起用臣
病實未痊可顧念昔叨侍從久被恩私無一言補報而
去於人臣之義未安重以親老家貧公私交迫故不得
已扶病赴職一則欲竭犬馬之忠少圖補報一則欲竊

升斗之祿以給俯仰此臣之志也而才智短淺言行乖違績効未有分毫過惡不勝指目又不能見幾早退至以不謹得罪猶蒙聖恩寬容不加重譴仍與善地初時猶欲勉圖後功以贖前罪而政務多端才智難強憂勞交劇疾病益增在任兩年患病過半若治臣瘵曠之罪自當從罷黜之科猥蒙超轉官階俾佐大郡蓋朝廷念臣曾叨侍從矜臣無所知識故優假之如此也臣雖至愚豈不知感獨念人臣之義陳力就列不能者止臣前

任開州事簡地僻尚多瘕曠今任東昌統轄十八州縣
路當南北要衝政務既多應接不暇以臣不才多病之
人豈能勝此近來病勢增重怔忡眩暈無日暫寧咳嗽
嘔噦不時舉發加以肢體疼痛神志昏迷舉措累有乖
違政務實多妨廢若不預求退避誠恐瘕曠益甚罪責
難免伏望聖恩矜憐乞勅該部將臣放歸田里使臣得
釋去罪責苟延性命臣不勝感戴戰懼之至

東昌再乞致仕狀

患病不能供職懇乞天恩放歸田里事臣先因患病不能供職於正德十年九月內奏乞放歸田里奏下未蒙覆奏臣竊料該部之意必謂臣病未至沈痼不忍即便棄捐此固大臣愛惜人材之意至於臣義之不可不去情之不能復留則該部蓋有未及察者伏念臣固滯迂疎褊狹狂躁既無臨政之才又無保身之術加以疾病侵亂神志昏迷舉措累有乖違職務實多妨廢特以上司委曲包容未即糾舉然包容者私情也糾舉者公法

也臣若不亟求退避至於瘵曠益甚罪狀益明上司雖欲委曲包容臣雖欲徼倖苟免皆不可得夫以瘵曠受罪在不才之人固不足惜公家之事不免有悞然則孰若未敗而去之為善乎此臣之義所以不可不去也臣嘗謂士生世間有才者則當進用而憂民之憂無才者則當退處而樂已之樂臣竊祿十有五年初無分毫補報臣之不才已可知矣况疾病已深神志已沮若復久留仕途展轉沈痼必至傷生進既無益於公退又不遂

其私俯仰身世抱恨何極此臣之情所以不能復留也臣竊聞聖人為治貴順人情故不責人以所不能強人以所不欲方今英俊如林不乏任用府貳之官亦人所歆慕夫使不才多病者退休田里而英明精健者馳驅仕途則上既不悞公事下亦順其私情大臣駕馭人材表正風俗之道一舉兩得何必留一不才之人然後為愛惜人材也哉臣誠情迫於中言語干冒罪當萬死伏望聖恩矜憐少寬斧鉞勅令檢臣先奏放歸田里使臣

得釋去罪責苟全性命臣不勝感戴戰懼之至

禮部再乞致仕狀

自陳衰病曠職懇乞天恩放歸田里事臣先因患病不能供職具奏乞恩放歸田里欽蒙准給假調理除欽遵外伏念臣稟受淺薄血氣早衰自新年以來每站立稍久則腰脊酸疼勞苦畧過則噦嗽並作頭目眩暈心志怔忡每感輒發每發增重臣竊計既衰無復壯之期居官無不勞之理若疾病畧發則職業必曠職業既曠則

罪責不免與其得罪而後歸不若見幾而早退是以冒昧具奏乞恩放歸田里荷蒙聖恩不即罷黜仍准給假調理臣不勝感激初亦欲勉強調理以圖補報奈病根已深調理難効經今半月不得痊可臣竊計病勢如此若復貪戀恩私不早引退則憂勞相尋病必沈痼非惟無以盡補報之忠且將不免貽性命之慮此臣所以日夜憂懼不知所處也伏望聖恩憐臣衰病將臣放歸田里俾得釋去憂勞少延殘喘以仰觀治化之成臣不勝

感戴天恩之至

禮部致仕謝恩疏

謝恩事臣先因患病不能供職具奏乞恩放歸田里欽蒙准臣給假調理續為自陳衰病曠職懇乞天恩放歸田里事奉欽依何瑋屢稱有疾准回籍養病欽此除欽遵外伏念臣猥以疎庸誤膺任使恩逾海嶽報乏涓埃茲以衰病乞歸復蒙准令養病臣不勝感激擬欲扶病入朝謝恩面辭重念病體尚虛眩暈時作誠恐傾仆失

儀深為未便為此除望闕叩頭外謹具本謝辭伏望聖德益崇皇猷允塞臣幸未僵仆尚當與農夫樵叟歌咏太平傳示無極臣不勝感戴戀慕之至

禮部三乞致仕狀

懇乞天恩憐憫衰病容令照舊回籍養病事臣先於本年四月二十五日因衰病曠職具奏懇乞天恩放歸田里荷蒙聖恩准放回原籍養病臣於五月初一日具奏謝辭於初六日出京回籍初七日行至張家灣地方准

吏部差人送到咨文內開節該欽差四川道監察御史
毛鳳詔奏陛下近准禮部右侍郎何瑋回籍養病如蒙
愛惜是才改命在京調理病痊即出供職等因節奉欽
依何瑋著在京調理病痊仍出辦事不許回籍亦不必
辭備咨到臣臣不勝感激伏念中外羣臣才德學術過
於臣者不可勝數選擇任用綽綽有餘陛下一聞御史
之言即改命臣在京調理病痊仍出辦事恩眷之厚臣
雖粉骨碎身亦不能報但念病勢有淺深則調理有難

易臣之病因血氣早衰每遇憂勞則發緣血氣之衰非旬月可補而職業之重不免憂勞若久病不痊則曠職有罪臣所以懇乞放回者蓋勢有所不得已也臣今已遵奉先次恩命回籍在途若遵依今次恩命仍復還京調理誠恐病痊無期既無以仰報聖恩而久病廢職且不免終罹刑憲此臣所以憂懼悲傷而不知所處也夫士君子進德修業孰不欲遭際明時少行所志享有爵祿以為光榮哉臣少年讀書亦頗辛苦今幸得遇聖明

之君見有富貴之樂使臣病堪支持心無憂懼亦安肯
無故求退以自處於貧賤之地哉然則臣之情可推而
臣之薄命真可憐矣伏望聖恩憫臣衰病之苦察臣懇
迫之情仍容臣照依先奉恩命放回原籍養病使得釋
去憂勞少延殘喘則未盡之年皆陛下之所賜也臣不
勝感戴之至今臣欲還京則患病不能欲回籍則懼罪
不敢進退維谷朝夕徬徨

辭免掌都察院狀

辭免新命乞恩容令照舊養病事臣於嘉靖八年四月內因衰病曠職具奏懇乞天恩放歸田里節奉欽依何瑋既屢稱有疾准放回原籍養病臣于五月初六日起程回籍本月二十三日准吏部咨該吏部等衙門題照得南京都察院右都御史員缺今推得禮部右侍郎何瑋兵部右侍郎黃衷俱堪委任伏乞聖明於內簡用一員令其到任管事等因奉聖旨何瑋陞南京都察院右都御史掌管院事欽此欽遵備咨前來臣不勝感激恐懼

即欲具奏辭免因在途次未便六月十六日臣始回至
原籍伏念臣因衰病乞歸荷蒙聖恩准令回籍養病方
幸苟延殘喘豈敢復望陞擢其南京都察院右都御史
員缺在位諸臣自足擢用不意該部推臣備薦又誤蒙
聖明簡用恩出望外事異常經臣誠不勝感激但念臣
方以衰病求退輒蒙非常恩命心實不安況都察院係
紀綱之司都御史為風憲之長雖兩京之政務繁簡不
同而百辟之具瞻彼此無異任是職者必其事無不知

知無不言庶幾少稱伏念臣才識迂疎學問粗淺於國
家之政務既未通知於臣下之賢否尤寡聞見加以見
今疾病侵尋神志摧沮怔忡眩暈無時暫寧嘔噦疼痛
有感則發豈能振舉紀綱仰贊廟謨不免上孤聖明簡
用之恩下失大臣薦揚之望得罪邦憲貽誚士林臣誠
不勝恐懼伏望聖恩憐臣衰病容令照舊原籍調理收
回新命改授賢能則國之紀綱可以振舉臣之私情亦
得便安臣不勝感激恐懼之至

表

恭上皇考獻皇帝徽號賀表

伏以化始家邦昭一人之有道禮先孝敬合萬國之歡
心凡在臣民悉皆忻忭恭惟皇帝陛下聰明天賦英睿
夙成上帝篤生默定神人之主大宗入繼允符中外之
心義雖重於所承恩豈忘乎自出肆隆名徽號既盡禮
於有常而備物殊稱兼伸情於罔極事緣義起含生仰
仁孝之風恩自上流率土受汪洋之澤臣等躬逢曠典

喜倍恒情限守職於南藩允傾心於北闕伏願致愛致敬篤孝養於兩宮多壽多男隆本宗於萬世臣等無任瞻天仰聖激切屏營之至

恭上昭懿慈壽皇太后徽號賀表

伏以英皇配舜垂千古之鴻名任姒母周啟一朝之盛治傳聞自古喜見當今恭惟昭懿慈壽皇太后陛下德備坤元聖同天倪贊襄孝廟敷陰教於四方啟佑武皇著母儀於九有贊揚遺詔迎立聖明寶位欲危而安人

心翕然以定此固天心之有在亦由聖德之難名肆皇
心圖報之無方致徽號屢加而不已臣民均慶夷夏同
懼臣等職守外藩心馳遙賀伏願思齋思媚追周世之
遺風永壽永康鄙漢帝之陋習慈闈有慶享孝養於九重
聖壽無疆永瞻依於萬國臣無任瞻仰激切屏營之至
恭上章懿皇太后徽號賀表

伏以命與德新聖主際龍飛之運母由子貴慈闈隆鴻
號之稱歡聲雷動於臣工喜氣春生於宮闕一朝盛事

千載竒逢恭惟章懿皇太后陛下毓秀坤元鍾靈月魄
徽柔素著懿範迥出於羣倫真順夙成盛德同符於厚
載是致皇天之眷篤生聖哲之君宸居既正於離明大
禮宜隆於長樂金書玉冊徽稱極九有之尊海錯山珍
奉養備萬方之品臣等幸逢盛事喜溢中心思桂殿以
傾心望楓宸而致祝伏願慈顏悅懌家邦永固於萬年聖
孝昭彰治化弘敷於四海臣無任瞻仰激切屏營之至

柏齋集卷一

欽定四庫全書

柏齋集卷二

明 何瑋 撰

序

宗藩孝行序

曾子曰生事之以禮死葬之以禮祭之以禮可謂孝矣
三代以還教化廢缺人子當親之存也事之尚不能如
禮至於葬祭尤為滅裂其可嘆者多矣宗室鄭王殿下

孝愛之性得之天授先王早逝每以不及躬事為恨事
母太妃曲盡愛敬乙亥正月母感疾王不脫冠帶而養
飲膳湯藥必嘗之而後進母既不起則呼號辟踊頓絕
復蘇凡歛而附於身殯而附於棺者必敬必戒朝暮奠
哭視禮有加焉塋在太行山麓去府城餘三十里王徒
步送葬左右請乘輿則泣曰吾自此不復見吾親矣徒
步何足勞也既葬左右請遵以日易月之制易吉服則
又泣曰短喪非古也自漢文帝始也父母之恩罔極聖

人定為三年之制示有終耳吾奈何捨之而遵漢文之
亂制乎左右乃不敢言既而請御酒肉賓筵請用樂皆
不許曰非惟禮不可心亦不忍也大小祥祭及四時之
薦必以禮而悲感視初喪無異焉由是國中士大夫之
習於禮者相與議曰生事葬祭以禮在士夫猶以為難
況王生長富貴之中乃能舉久廢之禮是可謂之孝
乎永言孝思孝思維則下武之詩所以頌周王也靡有
不孝自求伊祐思樂之詩所以頌魯侯也盖上有善而

下不知則為不明知而不以頌則為不仁是非貢諛蓋所以褒既往勸將來也王之孝如古人矣可無述乎僉曰善於是憲副吳道寧首賦詩以頌士夫咸繼作焉王姻親閭廷璧彙次之得詩歌樂府凡若干首以瑯嘗備員國史也迺屬叙其梗槩如右云

宗藩趙王殿下孝行序

彰德儒士蔡生繡介吾友瞿賢儒及門生張繼光來謁手捧一編書以示則宗藩趙王殿下孝行錄也予讀之

既蔡生乃作而請曰繡無似不能繼先人之志業儒無成蒙國主殿下招致書堂待以士夫之禮繡蓋深感德焉顧無以報念惟國主孝行之懿古今鮮比擬撰述稱頌傳之無極顧力不能擬借重執事一言幸甚賢儒繼光復助為之請予不得已乃告之曰錄中所載賢王殿下之孝有郡王之奏有該部之議有聖天子之勅有名公才士之歌咏序論凡所以焯德傳遠者備矣至矣予復何言無已則申明聖人立教之意以破世俗因循之說

以彰王休以定王志乎聖人立教罔不欲人入於善而不流於惡故有賞罰之典焉以賞罰或有所不及故又立為聖賢愚不肖君子小人之名以示褒貶榮辱焉使賞罰不及者亦有所勸懲自力於善而不流於惡其立教之意遠矣孔子曰君子去仁惡乎成名孟子曰令聞廣譽施於身所以不願人之文繡也意蓋如此孟子他章有好名之論不過謂好名而不出於自然者真情有時而發見不如安行者耳非為惡也世之急於自修而

又嫉賢妬能者於人之放辟邪侈無所不為者一切不問見人之修身飭行克自樹立者則往往從而謗之曰此好名者也孟子之所惡也一唱百和遂成風俗賢人君子志欲為善而中無定見者亦畏譏避謗不敢果於為善甚至委曲徇俗以求免譏謗之及其身亦惑矣孰謂孟子垂教之言而反貽害教之禍至於此哉愚竊謂無意於名而安行乎善者聖人也有意好名而利行乎善者賢人也不知名之可慕而肆意為惡者小人也盜

名欺世而行實未善者奸人也賢人之利行雖不及聖人之安行然則去小人奸人則遠矣論者不譏彼而反謗此是何心哉今觀趙王殿下之事祖母也居則致敬養則致樂病則致憂喪則致哀祭則致嚴孝之行蓋無不備矣及郡王奏請旌異則具奏辭免蓋安行乎善而無意於名者也是蓋聖人之用心也或曰王雖賢未可遽謂之聖曰王固未可遽謂之聖而其見則聖人之見也賢而利行進進不已安知不同歸於聖哉昔人有稱

夫子之聖者夫子曰聖則吾不能我學不厭而教不倦也聖吾不能辭其名也不厭不倦踐其實也辭其名而踐其實故至今稱夫子之聖者不衰王尚勉哉世俗之論無疑也蔡生曰執事之言甚正請書之繡將捧歸以獻於我國主於是乎書

鄭王加冠序

嘉靖癸巳正月三日宗室鄭王殿下始加元服庠生賈珮具禮稱賀徵辭於瑋瑋竊惟人生既長則冠自天子

達於庶人無以異也儀禮止有士冠禮公卿以上皆缺
或謂人無生而貴者故雖天子之尊冠必以士服是以
止有士冠禮及考於史則成王之冠也有史佚之辭魯
侯之冠也備金石之樂趙文子之冠也晉諸卿各有頌
戒之辭是知公卿以上冠禮非本無也以失傳而亡耳
我聖祖以禮治天下自天子皇太子親王以及品官士
庶人之冠莫不制為定禮垂教之意遠矣然天子天下
之主也天下之人賴焉親王一國之主也一國之人賴

焉蓋有非品官士庶人可比者恭惟賢王殿下天性聰明讀書尚禮童幼之時已有人君之度國人蓋久已歸心矣故今茲之冠無不忭蹈稱賀蓋禮之不容已者也何假於辭無已則聖祖自有訓辭在謹述以告可乎禮初加之辭曰惟茲吉日冠以成人克敦孝友福祿來臻蓋欲王孝於親友于兄弟以享福祿也再加之辭曰冠禮既舉寔由成德敬慎威儀惟民之則蓋欲王有威可畏有儀可象以治國人也三加之辭曰冠至三加命服

用章敬神事上永固藩邦蓋欲王主鬯奉祀謹於朝享以長守藩國也至此則人君之道庶幾備矣此固國人之所望也此固賈珮稱賀之誠也於戲賢王尚念茲哉

大司空靜菴胡先生改左副都掌院事序

靜菴先生以忠義才畧受知聖明嘉靖初元即自左僉都御史超擢吏部右侍郎未幾丁外艱歸服闋改兵部右侍郎以素病痰火發作無時朝參不便乃奏乞致仕不允復奏乞改南京閒散衙門調治亦不允內閣諸老

為請乃命改南京吏部左侍郎時嘉靖五年秋也今年
夏簡命為南京工部尚書未幾復簡命為左都御史掌
都察院事先生聞命下戚然不悅曰某以病乞改南今
病未愈豈可復造朝即造朝病安可支亦歸老田畝已
矣乃具疏乞致仕將堅卧不起僚友或勸之曰士君子
為學行道得君最難蓋有終身不得者焉今聖上之於
先生知之可謂深矣待之可謂厚矣任之可謂重矣有
君如此豈忍負之況君命召不俟駕禮也今病未至不

能出門戶而輒欲堅不起不敬孰大焉宜亟造朝以面
吾君如病不能支則天也至此時而去誼無憾矣豈可
預憂其不支而偃蹇若此乎先生蹙然變色乃始治裝
為行計僚友咸賦詩贈別僉謂瑋叨從同僚後宜有言
嗚呼瑋何言哉瑋竊聞士君子之論多謂天下之治在
庶官之得其人庶官之進退權雖在吏部至於考察其
賢否才不才之實以報吏部則巡按御史寔提其綱近
年御史之巡按者類挨次點差不復選擇故時不得人

由是庶官之賢否才不才往往失實先生掌院事亦留意於此已矣御史巡按之差惟其人不惟其次綱舉目隨則官皆得人天下之治可坐而致塘竊謂先生國之大臣也君德朝政何所不預而論者獨以此為言豈非以此為職掌之所急歟雖然天下之事言之易而行之難行而有成功為尤難至於變法而能成功則難而尤難者也盖人情安常駭異所安者雖有不善未必以為非所駭者雖有大益亦未即以為是易之革曰已日乃

孚蓋言變法之初人未之信必久而後信也又曰元亨利貞悔亡蓋言變法而當其悔乃亡否則有悔也是豈可易易而為之哉宋仁宗延輔臣于天章閣訪問治道韓琦范仲淹各條上時弊數事方及施行謗議隨起韓范相繼去位而宋之治不可成矣變法之難蓋如此我朝吏部循資格以進退庶官都察院挨名次而奏差巡按御史其來非一日矣今欲變之豈可易易而為之哉先生忠義才畧孚於上下久矣處此計必有道竊嘗聞

人之愛君子者恒望其有成而憂其未濟故苟有所見輒以告之備采擇焉至言之可用與否則未暇計也大抵法之變也有漸則人不驚大寒不能驟變而為大暑大暑亦不能驟變而為大寒天道且然而況人乎哉去其太甚而遵其可上下者寬以待之忍以持之久則融化矣抑人情意得者多自是功成者多自驕自是則不能受人之言自驕則易以來人之妬書云有言逆於汝心必求諸道有言遜於汝志必求諸非道又曰汝惟

不矜天下莫與汝爭能汝惟不伐天下莫與汝爭功皆格言也先生念哉聖明之託天下之望庶乎其不負矣

兵侍石峯陳先生考績序

兵部石峯陳老先生以歲十二月奏績京師閩士大夫官南京者俞君陳君林君相率徵言以贈且曰石峯老先生吾鄉之望也嘉靖改元以右副都御史巡撫江西明年改南京大理寺卿又明年改南京兵部右侍郎在巡撫地方安堵在大理獄無冤民在兵部內外無草竊之

警此皆彰彰在人耳目者也茲以三載政成入報天子
敢祈一言以贈塘敬慕先生久矣況諸君見命其何敢
辭所懼淺近之言不足以發揚盛美耳正德初年逆瑾
用事陰排諸老顯挫臺諫天下蓋岌岌乎危矣先生時
以御史督學於南畿即上言老成不可不惜狂直不可
不宥言甚切至疏入忤旨謫丞揭陽南畿之士聞當棄
去徒步追送踰數十里不捨至臨歧皆洒淚以別當是
之時先生忠直之聲寬厚之德蓋已動朝廷而聞天下

矣。瑯心識之然無由見也。頃來南都始得承顏接辭見先生凝重如山岳渾涵如江海蓋有所謂澄之不清撓之不濁招之不來麾之不去者焉。益加敬慕以為不可測。乃今復聞所未聞始知先生蓋儒之有道者是固不可以淺近測也。竊嘗謂儒者之道包羅天地揆叙萬物無所不有。故學至聞道則達窮崇卑遠近大小隨試輒効。先生信儒之有道者歟。不然何功業之成隨寓而著有如是耶。竊於是重有感焉。古稱才難全才尤不易得。

唐虞之際命官九人固皆極天下之選也然而典禮典樂掌教掌刑皆久於其職有終身不易者豈非以才性各有所長職業各有所習兼全之難故耶至於內總百揆出總六師土地山澤無所不掌惟禹益為然全才之不易得蓋如此今先生巡撫未幾而改大理大理未幾而改兵部功業之成如倉公之藥隨試隨効如由基之射百發百中其才之全蓋可以追配禹益矣奏績京師受知天子端委廟廊之上以輔成唐虞之治盖有可預

知者第念近日當道用人司錢穀者未久復改之典刑
獄職風紀者未久復改之任民牧計資而遷遇闕而授
初不問其所長所習無乃以全才待天下之士乎其意
良厚矣所慮全才不可多得用違其長則王良操弧伯
羿執轡非惟無功且或敗事是固不可不深長思也詩
云左之左之君子宜之右之右之君子有之謹誦此以
為先生贈語云無求備於一人又云及其使人也器之
因先生之行而一誦焉倘當道聞而見取未必非用人

之一助也狂夫之言聖人擇焉幸留聽勿忽

贈都察院右副都御史申臺張先生巡撫遼東序

士君子處難處之地而能成功者非獨其才之有為也
蓋亦有高遠不凡之識堅忍不拔之操焉夫天下之事
紛至還來利害得失之幾間不以髮非有才者固不能
辨也然而事之輕重緩急莫不各有一定之序士君子
之有識者則恒先其本而後其末雖隨機應變者不可
預圖而其規模所在則未嘗不先定也規模既定則小

故不搖浮言不惑而事之不濟者鮮矣國朝之制聖天子高拱於穆清之上省方觀民之典則委風憲重臣其名曰巡撫夫受九重之託而一方安危之寄巡撫之職蓋已有不易盡者而邊方尤難蓋內地之巡撫止於察吏治之臧否驗民生之休戚而已事有常規可守而行至於邊方則外與強敵為鄰常規之外又有用兵之寄焉用兵雖有總戎專職然而政令之弛張軍機進退巡撫重臣鎮守內官無不叅預必或不同則動相掣肘坐

是敗事者多矣况夫敵人之盛衰無常中國所以禦之者在士卒之用命與否耳士卒之情撫之不可以無恩而毆之則不可以無威威過則離恩過則慢古人謂愛民如嬰兒故可與之赴深谿又謂能愛而不能令猶養驕子不可用也斟酌於政令之間恩威不偏使士卒樂於用命斯亦難矣僚友既和士卒用命然後外侮可禦地方可安斯不亦甚難矣乎然而士君子之有識者則處之莫不有道姑以一家之事明之君父母也僚友則

兄弟之共事者也士卒則家衆也敵人則外侮也兄弟所見雖或不同至於欲父母之喜而畏其怒則同兄弟所見或有未善吾不必遽責之也則告之曰如此則敗家事得無貽父母之怒委曲懇款不詭不激有不欲信從者乎家衆所急者饑寒困苦也事事不恤而惟責以用命其將謂何吾則益其衣食去其患害家衆飽矣煖矣身安而無事矣猶或慢令再三教戒之而不改則衆皆知其罪之有在矣然後懲一以戒百有不肅而奔走

者乎兄弟和家衆用命則於禦外侮何有竊意巡撫重臣若以待兄弟之道御僚友則無有不和御家衆之道御士卒則無不用命外侮可禦地方可安功業之成盖可坐而致矣申臺張先生由南京光祿卿擢都察院右副都御史巡撫遼東同鄉士夫官南京者相與餞別謂瑋為同年友也宜為言瑋謂遼東邊方也而先生之才識操守俱過人其立功可必也故以此告之昔吾鄉先生如鈞陽馬公靈寶許公俱立功邊方然後入佐大政

於巖廊之上至今赫赫在人耳目申臺念哉罔俾阿衡
專美有商同鄉固以此望先生矣

仰止黎先生改北京通政提督謄黃序

嘉靖甲申予承乏南京太常寺始與大通政仰止黎先
生相識見其談笑自如不立崖岸竊以為和易可親及
察其居官守身各有常式無少滲漏則又以為非苟同
者徐與之處聽其論天下事不激不隨整整有條理可
按而行則又知其中所蘊蓄有不可以常情測者由是

遂與定交動息相咨出入必偕蓋三年無少變焉今夏
吏部因北京提督騰黃通政缺以先生薦詔允之先生
戒行僚友各賦詩贈別函谷許先生屬瑯為序於戲頌
德叙情期以遠大諸作備矣茲復何言無已則騰黃乎
先生之才於天下事無所不可為其視騰黃蓋牛刀而
雞割也宜不必論竊嘗謂君子之智隨寓而發故牧羊
可以擾萬民作室可以相天下況黃之所紀皆諸臣立
功之迹而國家開創之畧亦有存乎其中者哉黃所紀

功臣多國初人承平雖有之亦鮮矣聖祖提三尺劔以
有天下雖勇知天錫然亦有諸臣之助焉黃所紀公侯
伯則贊廟謨而專閫寄者也黃所紀指揮千百戶之屬
則執干戈而冒矢石者也當其時間關百戰性命盖有
不可以朝夕保者亦既勞而且危矣創業艱難君臣同
之先生繙閱之際夫豈能無所感乎論功錫爵與國咸
休山河帶礪之盟聖祖未嘗有彼此也攷乎其後則傳
爵至今者有焉奪爵覆宗遂至無噍類者有焉稽於黃

可知也其傳爵者豈非忠孝敬信受知於朝廷而見佑於神明者乎其奪爵者豈非悖逆驕奢得罪於朝廷而見怒於神明者乎祖宗之立功同而子孫之盛衰異繇閱之際吾知先生之不能無所感矣由小可以知大由人臣可以知人君先生其有意乎哉他年輔佐之功業盖未必不於謄黃有發也吾於先生乎有望矣

湛甘泉考績序

聖賢之學明德新民而已無他道也近世學者往往從

事於博洽葩藻之間不然則高談性命以為理學至於
明德新民之實則留意者鮮矣弘治正德之間甘泉湛
先生與一二同志獨以古學為倡天下之士翕然稱之
曰甘泉先生今之道學也嘉靖三年南京國子監祭酒
缺員吏部以為非先生不可乃以名聞詔可之既蒞任
則嚴規矩申約束日與諸士子講古聖賢明德新民之
道暇則習燕射禮雅歌擊磬以養其心使無外慕士習
益不變焉三年教成將奏績北上司業琴溪陳先生間

謂塘曰臨別贈言古也甘泉北上必將留侍聖天子不
南來矣子雅厚於甘泉者也豈可默焉已乎予應之曰
予往年亦嘗問學於甘泉予則以格物致知為先甘泉
則以存心為主所見畧不同然非存心則無以為格物
致知之本物格知至則心之體用益備盖有交養互發
者焉是則要其終固未嘗不同也甘泉既以其學造就
天下之英材備朝廷之選用矣則其入告天子豈假外
求哉今雖有言恐無益也琴溪曰固然然古之贈言者

豈必皆有所益乎亦盡心焉爾已
唐曰唯唯竊聞臣之告君與師之告弟子其道雖同其術則異師之告弟子或開其端而不究其歸或提其綱而不及其目蓋欲其深思而自得之也臣之告君則不然詳畧相因首尾畢舉蓋欲君即可見之施行不復勞其心思也昔魯君嘗問政於孔子矣孔子告以治天下國家之道自修身尊賢親親敬大臣體羣臣以至子庶民來百工柔遠人懷諸侯無不畢具其施行之條目功效之次第復纖悉周

密其要則不外乎誠之一言其所從入則始於擇善固執之兩端噫可謂詳而約矣聖天子勵精圖治夫豈魯君可比古聖賢之道固宵旰所欲聞也甘泉入而奏績夫豈可不知所留意哉在上聞大道之要在下蒙至治之澤吾於是乎有望矣琴溪曰此甘泉之志也盍遂書以為臨岐贈於是乎書

少司成郭杏東考績序

杏東郭先生任南京國子監司業蓋三年於今矣教行

化成迺北上奏績於明天子僚友各賦詩贈別甘泉湛先生謂予同鄉不可無言嗚呼予何言哉離合之情規待之意諸文之述備矣予復何言則舉吾儒之常談以告其可乎今之國子監古大學也古者大學教人之法具載聖經其綱領有三而其條目有八要其功用所終則至平天下而極原其用力之始則由格物致知以進固吾儒之所常談而衆人之所習聞也竊以為天下之物多矣欲一一而知之其勢盖有所甚難者孟子有言

知者無不知也當務之為急古之君子何為而學也為修齊治平而學也則其格致之所當急者固有在矣身如何而修家如何而齊國如何而治天下如何而平細而言語威儀大而禮樂刑政此其物之所當格而不可後者也博學而審問焉慎思而明辨焉一旦卓有定見則所謂物格而知至者在是矣由是而發之以誠主之以正然而身不修家不齊未之有也使其得君得位以行其志然而國不治天下不平者亦未之有也大學之

道亦若是而已矣至於究其本源則為性為命形於著述則為詩為文固非二道特其緩急先後各有次第不可紊耳今之君子不察乎此刻意詩文則曰立言不朽此英傑之所以名當時而垂後世也留心性命則曰無極二五窮神知化此大儒所以繼往聖而開來學也至有為趨詣捷徑之學者則又曰理出於心心存則萬理備吾道一貫此聖人之極致也奚事外求噫為此論者皆天下豪傑之士也吾豈敢謂其不然哉特恐其於修

齊治平之道反有所畧則所學不適於用而所用不出於學于古人之道不免有差耳平生管見以此為的往嘗與朋友論之或然或否然者未必深以為然否者則怫然徵于聲發于辭者有之矣豈非平平之談人所習聞故厭忽之耶因是閉口不談茲以杏東任大學教人之職而雅有志於古君子之道也故申以告不知杏東竟以為然否也

賀大司徒韓老先生壽八十序

天之保佑國家莫大乎錫之以壽考之臣蓋使之以上
翊王度下澤生民其任非小小故也顧其離合進退之
迹則有不可以一律齊者焉或始終在廟堂之上或始
合而中離卒乃大見信任致功業赫然於天下後世是
皆有數存乎其間其為天保佑國家之意則無以異也
始終在廟堂之上若伊傅諸公是也周公輔相武王平
定四海其忠聖蓋天下盡知之至成王之時召公則在
廟堂之上周公乃以流言之變避居東都後成王感風

雷之變啟金縢之書始悟而迎公以歸大加信任於是
乃戡定禍亂坐致太平功業之隆至今餘二千年猶赫
赫如前日事竊以為周公之功固大矣使非天賜以壽
考之福成王未及悔悟輒先朝露抑安能至是哉是知
周公之壽考蓋天保佑周家之意有在而非人力之所
能為也厥後周公語召公以老臣輔國之功歸于天壽
平格其所感者深矣孝宗朝質菴韓老先生位大司徒
以正直忠厚聞於天下今上初元太監劉瑾用事先生

乃退居洪洞迄今蓋十有五年矣而起居康健聰明志慮不衰今年壽登八十子士奇以鳳陽貳守擢守懷慶便道歸省九月二十六日值老先生初度之辰稱觴上壽懷慶同寅諸公聞之謀致禮往賀焉乃來徵言于瑋瑋竊惟老先生蚤以名進士任諫垣敬歷中外幾四十年乃至大任忠義在朝廷利澤在藩省聲名在天下蓋有不待贊者而中經變故與周公避居東都之迹相類方今黃髮元老可以繫天下之望者中外不可多得老

先生乃壽考康健不衰安知天之意不有在乎他年蒲
輪迎歸端坐廟堂之上贊我聖明太平之治於億萬年
之遠如周公之在當時蓋亦理之所有者也天之意雖
未可知而天下之士固以此望老先生矣今日壽考之
賀蓋上為宗社下為生民而不止為一人一家之私也
詩云高山仰止景行行止老先生固天下之所仰哉

贈太宰玉峰朱先生致仕序

嘉靖六年例該考察京官兩京吏部都察院奉命考察

奏請發落訖廷臣有言南京考察六科給事中不去一人為畏其勢不敢去者有旨命再考察南京吏部尚書玉峯朱先生迺具奏辨明且乞罷黜大意以為朝廷立考察之法非欲各衙門一槩有所去也可去則去可留則留惟公道是主南京六科給事中止有七員委無可去故皆留之何謂畏其勢而不敢去哉若必以畏為嫌務去一二人以為避嫌之計雖有所枉亦不暇顧又豈得為公道哉然其所謂畏者無他蓋畏其彈劾以致黜

退耳臣若不自引退亦何以自解於人言哉再照考察
事例罷軟者當去有疾者當去若臣畏避權勢正所謂
罷軟者當去一也況臣久患痔疾痛楚呻吟精力日耗
委難勉強供職當去二也伏望聖明俯監愚悃特賜罷
黜幸甚奏入有旨卿既有疾准致仕有司月給米三石
歲撥人夫四名應用欽此命下士夫惜先生之去者咸
往唁之先生慨然曰銓衡事重常恐不勝任以取罪咎
蒙恩許致仕吾知免矣色甚喜士夫既惜先生之賢又

高先生之志各賦詩贈別少宰蒲汀李先生間謂瑋曰
部屬諸君之詩其既為序矣僚友諸公之詩執事幸留
意焉再三以不文辭不獲瑋竊惟孔子有言君使臣以
禮臣事君以忠夫臣之事君竭股肱之力以趨公家之
務孜孜不敢怠忠也力有所不能義有所不可則乞骸
避位不敢詭隨面諛以為容說之計亦忠也君之使臣
委以腹心言聽計從使修其職業禮也有故求去則體
其情而許之歸亦禮也至於恩典優渥施於去位之後

則又禮之加隆者也先生之所以自處聖明之所以處先生者可謂各盡其道矣明君臣之道彰朝廷之美以示天下後世法諸公之作夫豈可已哉竊又聞國朝狀元無慮餘五十人位至卿相者不過五六人以道去位蒙被恩禮者又止一二人噫先生可謂全福矣竊嘗觀先生為人莊重簡默與人無嬉戲論議行事必審而後發平居恂恂若無所異及臨大節則有確然不可奪者內凝定而外渾成蓋全德君子也諸福之萃豈偶然哉

原德福之相因昭天道之不爽崇厚警薄諸公之作盖
有關世教焉匪直彰朝廷之美而已也塘不佞於先生
之賢未盡稱述姑以是冠羣玉之首塞蒲汀之命云爾
已矣

司空何燕泉先生養疾序

九月之吉公事既治司廳徐君及四司正郎何君等進
謁曰燕泉何先生得請歸原籍養病時維諸老先生
各賦詩贈別蕭長山先生實掌部事乃請少宗伯類菴

趙先生之文冠於卷首卷未及成而燕泉行未幾長山
類菴一時去位代燕泉者為信山韓先生亦相繼去位
已而靜菴胡先生貞菴周先生嗣掌部事後相繼改官
赴詔北上卷今成矣將寓歸燕泉先生而序文尚缺敢
以告下執事予既諾之揖諸君退乃取卷閱之則諸公
之作俱在有長篇焉有短章焉層見疊出如入瓊林大
盈珠玉輝映盖有應接不暇者則嘆曰休哉燕泉之盛
德大業乃為人所敬慕歌頌如此既而歷數作詩諸公

則去位者有焉去世者有焉既官而去南都者有焉今
存者僅有其半則又嘆曰人事之不常如此存沒聚散
之際其可感也乎予因是泛觀天地萬物之化寒暑晝
夜代遷而行風雨煙雲頃刻而變蓋有不能以一息停
者飛者或化而為潛植者或化而為動如蜃蛤蛇雉老
楓羽人朽麥蝴蝶之類不可勝數則又嘆曰天地之氣
與萬物之形體皆不可常如此世之人於外物之倘來
寄者乃認為已有欲常保而不失豈不誤哉古之人視

禍福得喪如寒暑晝夜之代乎前畧不介意其所見遠
矣抑又聞榮啟期九十帶索行歌不休或問所樂則以
得為人得為男子對夫世之得為人得為男子者何限
其間聰明博達者有幾蓋已少矣得時得位置身朝廷
之上者有幾功業行乎時聲名垂於後與古之聖賢同
不朽者有幾蓋滋少矣燕泉先生總角聰穎過人弱冠
即以文章取高第有大名於天下已而官郎署官藩臬
官巡撫皆有惠澤在人進貳銓衡品藻進退天下士立

朝侃侃不阿雖以議大禮忤旨改官南部然天下之士
聞先生之名者識與不識莫不加敬今雖養病去然縉
紳之歌頌德業者疊疊不休所謂功業衍於時名聲垂
於後可與古聖賢不朽者先生非其人耶由前則世事
不足較由後則先生之所得過榮氏遠矣夫豈不足以
自樂也耶樂則神怡神怡則氣溫吾知先生之病不藥
自愈他日復起而佐聖明之治未可知也先生其亦有
以自樂也耶予昔見愛於先生未及請益而先生去矣

因序諸公之詩而一發其狂言如右先生其亦有以教我
我也乎

贈少司空信山韓先生致仕序

少司空信山韓先生自筮仕以至卿佐以忠信清謹自
持無豪髮苟今年科道惑於流言劾先生阿附逆瑾侵
尅官銀失大臣節朝廷未及察也迺令先生致仕士論
皆為稱屈所謂阿附逆瑾蓋指先生任中書選給事中
事而言也中書舊不預科道之選正德初年劉瑾用事

中書李憲其鄉人也謂中書博士行人俱由進士出身而中書獨不預科道之選理似不平瑾以為然乃令中書由進士出身者與博士行人一體選科道憲由是得給事中明年先生與同僚二人亦得選給事中是開此例者憲也非先生也故瑾敗憲即斥去先生獨無異議不然當時科道豈肯置先生不問哉所謂侵尅官銀蓋指先生任總督時修倉事而言也修倉銀兩主之者戶部委官也協同支銷者巡倉御史也先生不過考其出

納之數耳未嘗經手何由侵尅以故士論皆稱其屈意
此無恠其然也曾子之不殺人人孰不知其母知之宜
有萬萬於他人者曾子殺人之言三至其母亦投杼踰
牆走矣周公避流言之謗退居東都成王未察也亦不
之止既察則迎公以歸有不俟終日者矣曾子之母豈
不慈成王豈不聖流言之多固易惑而難辨也科道誤
劾先生朝廷令先生致仕夫何恠哉或曰是固然矣造
言者則可惡也噫亦不必惡也乘喜怒以毀譽人者往

往失實喜怒既平則固有自悔而自咎者矣是皆常情
亦可恕也況毀譽雖出於人而得喪實由於命孔子不
惡公伯寮其道大矣吾嘗聞先生言在庠序時星士余
姓者謂先生大運至已當轉亞卿即避位乃善徵之於
今若合符契此豈非孔子之所謂命耶先生可以釋然
矣或問先生廉於守官而篤於親故俸祿所入多費於
問遺周濟故囊無餘積家無厚產今茲之歸貧困奈何
噫是不必慮也守正而不遇者天與之厚而不報者人

與之天人所與蓋未有終困窮者也周公遠矣少宗伯
東江顧先生在嘉靖初年流言謂其通賂權要科道交
劾之遂致仕去後科道知流言之失實也復交薦之今
徵用矣先生之去何遽為之戚戚也哉先生將行僚友
各賦詩贈別蒲汀李先生屬瑯序靜庵胡先生復以手
書來促乃述士夫公論以歸之如右噫先生可以釋然
矣

贈石龍黃先生致仕序

經憲石龍黃先生以議大禮為朝廷所錄擢南京繕部員外郎石龍久有去志先已具疏乞致仕未報至是復具疏乞致仕不俟報遂行僚友俞君輩惜其去而不可留也迺徵言於予以贈予獲交石龍舊矣於其去也固當贈之以言況又有諸君之命乎予嘗謂處繁難然後見人之才臨利害然後見人之守平居議論皆未可信石龍在武宗朝始仕為後府都事時垢弊紛然石龍悉簿正之中有武職依憑中貴侵官銀至萬計莫敢問者石

龍竟發其事中貴雖銜之無以害也已而乞致仕去今
上登極侍御朱守中以石龍有王佐才薦起之擢今職
石龍持憲奉公上下倚賴差遣刑名簿書出納之際惟
清惟允雖絲毫必盡其心會大禮議起廷臣意見不同
互相攻擊石龍謂廷臣不和則君心疑上下之情扞格
不通為害非細迺具疏論救因援古證今明大禮之所
宜從甚辨既而大禮議定凡與上意合者悉進官石龍
志弗樂也即具疏乞致仕及繕部命下而去志不可回

也遂行噫石龍之才之守亦畧可見矣非賢者固不能也或謂石龍曾大父職方慎齋公大父少司空定軒公父文選方麓公世有賢名而少司空尤為海內所欽仰石龍始師少司馬石峯陳先生習舉子業繼師前少傅宗伯方石謝先生學古文辭後及今大司馬陽明王先生大司成甘泉湛先生講明心學之奧數先生皆人望而方石尤為後進所矜式石龍之賢淵源有自矣予竊以為古今名臣之子孫不類其世者多矣而師友之見

亦往往不出於一然則石龍之賢謂其淵源有自可也
謂其深造獨得亦可也皆不必深論獨念古之聖賢一
出一處莫不有道自是道之不明也以隱為高者往而
不返以仕為通者溺而不止或謂與其為通吾寧為高
斯言蓋有激耳非其至也孔子之言曰天下有道則見
無道則隱又曰用之則行舍之則藏聖賢出處之道宜
無是過春秋之時何時也孔子迺栖栖不去豈以其時
為有道乎抑以列國之君有能用已者乎沮溺丈人之

傳蓋所謂無道而隱舍之而藏者也迺不為所取抑又何歟由是而推則出處之道固未可以一言盡也竊謂士君子必能超然於富貴貧賤之外一衣一食足以自老一丘一壑足以自樂富貴貧賤於我何損益哉古之聖賢於此其見之也審矣道有可行之幾則出而仕經世濟物以遂吾仁天下之心從容開導左右斡旋以求其濟者蓋無所不用力焉固未嘗悻悻於一言一事之從違而遽去至於事不可能勢將有變則又見幾而作有

不俟終日者焉變化從時不拘一法神幾妙用蓋不可
以常情測者古聖賢出處之道亦畧可知矣蓋超然於
富貴貧賤之外聖賢與高尚之士同至於仁天下之心
濟天下之才則高尚之士蓋未必能預也孔子不滿於
沮溺丈人之儔蓋以此世之君子無聖賢之心之才於
富貴貧賤之間未能無累迺輒以孔子藉口吾恐其無
以服沮溺丈人之儔而免其竊取也噫吾於石龍之去
又安能不重有感哉嗚呼天下之道大矣石龍何以教

我幸無謂碌碌尸素者不足與言而外之也

御史司馬魯瞻之湖廣刷卷序

為治之道有任法有任人古之治任人後之治任法任人者非無法也法舉其綱纖微曲折之間進退損益則主者得以制之期於事治民安不失法意而已是之謂任人任法者非無人也纖微曲折之間莫不有法如是則進如是則退如是則損如是則益人之當其任者守法而已能守法矣雖事煩民擾上不以為罪也不能守

法雖事治民安上不以為功也是之謂任法國朝之治
自廟堂之上以至郡縣之間自黜陟刑賞之大以至於
錢穀工作之細莫不各有一定之法有司奉行惟謹大
抵任法者也法之細碎耳目不能以徧記故必有簿書
焉簿書之欺謾上下不能以相保故又有鈎考之法焉今
所謂照刷文卷者是也朝廷恐有司之黨比不可任也
凡照刷文卷皆差御史一員往蒞其事夫御史朝廷之
耳目也大賢之所以進大奸之所以退善政之所以行

敝政之所以革靡不憑之其任重矣照刷文卷特承簡命夫豈不思所以盡其心哉顧文卷之集於几案者山堆川委雖竭精神窮日夜以鉤考之亦未必盡得其敝之所在可謂甚勞而且難矣論者率謂任法者勞而少功不如任人者逸而有終斯固然矣然任法者朝廷之制也守法者臣子之職也生今之世反古之道夫豈可哉無亦考法外之意乎人亦有言日月之明無所不照而陰崖鄙屋之下時有所遺人不謂日月不明大者既

舉小者可畧也雷霆之擊有罪固未嘗人人而擊之也
然語及雷霆之威凡懷奸負罪之人無不畏懼改悔者
以其威之有時而不測也侍御司馬魯瞻才而賢者也
受命之湖廣照刷文卷兼查盤軍器僚友譚君希曾湖
產也徵言以贈予惟士之才而賢者能用法外之意以
濟法所不及雷霆之威日月之明固司馬君之優為而
亦譚君之所深望也謹述以贈嗚呼君尚念哉


洛陽吳壽夫考績序

洛陽吳君壽夫以名進士擢南京山西道監察御史蓋三年於今矣茲赴京考績同寅粘君某喬君某以瑯於壽夫同鄉也迺來徵言以贈予惟人臣之誼有官守則思修其職有言責則思盡其忠我朝之制內設府部寺監外設司府州縣各有所典之事蓋所謂以官為守者也侍則設六科給事中風憲則設十三道監察御史俾之論列天下之事則所謂以言為責者也予嘗謂修官守之職易盡言責之忠難何以言之蓋官守之職各

有司存循禮奉法政無缺失而職固已修矣選舉不清人不以咎戶部財賦不節人不以咎禮部非其職也則庶官可知矣至於有言責之寄者則不然上則君德之汙隆下則臣職之修否皆所當言故一政之失一物之不得其所言官預有責焉欲盡其忠茲不亦難乎況夫人品之賢否政事之得失散在天下者多矣聞見異同愛憎異情吾知之有所未真而輕言焉則無益於天下之治而或有害知之真矣上慮君心之疑下慮羣議之

奪憂謹畏譏惴惴自保或含蓄而不敢言或輕言之而不敢盡于是乎天下之清議起矣知之真矣能直言矣或素行未足以取信於上下或論議正救未能盡其術則其言未必得行而反復相激或至貽天下之禍夫真知天下之事非知者不能直言非勇者不能素行足以取信於人而言盡其術非仁者不能全是三德而後言責之忠可庶幾焉茲不亦甚難矣乎壽夫為御史三年矣天下之事諮詢於僚友之間數納於廟堂之上其真

知而直言之者屢矣簡在聖心見之施行者計亦多矣
茲行也陟明遷喬盖有不俟卜者竊嘗聞君子之事君
也其心恒不滿足故職雖修矣而猶望其日修忠雖盡
矣而猶望其日盡方今聖明在上雖化理清明而未必
無一事可言鳳鳴朝陽天下傾耳吾盖於壽夫有望焉
此亦僚友贈言之意也



柏齋集卷二